

Na osnovu čl. 4.2 i 4.8, Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11) i člana 16. Metodologije za izradu tarifa za usluge distribucije električne energije u Brčko Distriktu Bosne i Hercegovine ("Službeni glasnik BiH", broj 89/11), rješavajući po zahtjevu Javnog preduzeća za komunalne djelatnosti "Komunalno Brčko" d.o.o., Brčko Distrikt BiH, broj: 02.01-16685/11 od 4. novembra 2011. godine, na sjednici Državne regulatorne komisije za električnu energiju održanoj 22. decembra 2011. godine, donijeta je

ODLUKA

O TARIFNIM STAVOVIMA ZA USLUGE DISTRIBUCIJE ELEKTRIČNE ENERGIJE U BRČKO DISTRIKTU BOSNE I HERCEGOVINE

Član 1.

(Predmet)

Ovom odlukom utvrđuju se cijene distribucije električne energije, izražene kroz tarifne stavove, koji služe za obračun i naplatu usluga distribucije električne energije od kvalificiranih kupaca električne energije u Brčko Distriktu Bosne i Hercegovine.

Član 2.

(Tarifni stavovi)

Tarifni stavovi za usluge distribucije električne energije za kupce u Brčko Distriktu Bosne i Hercegovine su sljedeći:

OPIS			Tarifni stavovi za usluge distribucije električne energije					
			Obračunska snaga		Aktivna el.energija		Prekomjerno preuzeta reaktivna el.energija	
Kategorije potrošnje i grupe kupaca		Jed. mjere	KM/kW/mjesec		fening/kWh		fening/kVArh	
Naziv kategorije	Naziv grupe	Doba dana	VS (zima) NS (ljetno)		VS (zima) NS (ljetno)		VS (zima) NS (ljetno)	
			35 kV		VT	2,69		0,73
		MT			0,37			
10 kV		VT	6,81		1,57		3,02	
		MT			0,78			
0,4 kV - ostala potrošnja	1 TG	VT	11,50		2,22		4,19	
		MT			1,11			
	2 TG	ST	3,41	2,62	5,16	3,97		
	3 TG	VT	3,41	2,62	5,88	4,52	4,30	3,31
MT		2,94			2,26			
0,4 kV - javna rasvjeta		ST			5,84			

Navedeni tarifni stavovi ne sadrže iznos poreza na dodatu vrijednost.

Član 3.
(Obračunska snaga)

Obračunska snaga iznosi 5 kW za tarifne grupe kupaca iz kategorija potrošnje na 0,4 kV kod kojih se obračunska snaga ne utvrđuje mjerenjem (2. i 3. tarifna grupa iz kategorije ostala potrošnja).

Član 4.
(Tarifni stavovi prema sezonama i dobu dana)

- (1) Tarifni stavovi za aktivnu energiju primjenjuju se prema sezoni, i to:
 - a) u višoj sezoni (VS) od 1. oktobra do 31. marta,
 - b) u nižoj sezoni (NS) od 1. aprila do 30. septembra.
- (2) Tarifni stavovi za aktivnu energiju primjenjuju se prema dobu dana, i to:
 - a) veći dnevni tarifni stavovi (VT) od 6 do 22 sata tokom zimskog računanja vremena, odnosno od 7 do 23 sata tokom ljetnog računanja vremena,
 - b) manji dnevni tarifni stavovi (MT) od 22 do 6 sati tokom zimskog računanja vremena, odnosno od 23 do 7 sati tokom ljetnog računanja vremena.

Član 5.
(Obaveza objave tarifnih stavova)

Javno preduzeće za komunalne djelatnosti “Komunalno Brčko” d.o.o., Brčko Distrikt BiH, kao korisnik privremene licence za obavljanje djelatnosti distribucije i snabdijevanja električnom energijom, dužno je na odgovarajući način objaviti tarifne stavove i relevantne odredbe ove odluke, te ih učiniti dostupnim svim kupcima na području Brčko Distrikta BiH.

Član 6.
(Završne odredbe)

- (1) Ova odluka stupa na snagu danom donošenja, primjenjuje se od 1. januara 2012. godine i bit će objavljena u “Službenom glasniku BiH” i službenom glasilu Brčko Distrikta Bosne i Hercegovine.
- (2) Odluka sa obrazloženjem dostavit će se podnosiocu zahtjeva i objaviti na internet stranici DERK-a u roku od 30 dana od dana donošenja.

Obrazloženje

Shodno Odluci o osnivanju javnog preduzeća “Komunalno Brčko” d.o.o., Brčko Distrikt BiH (“Službeni glasnik BD BiH”, br. 20/07, 21/07, 24/08 i 33/09), “Komunalno Brčko” d.o.o., Brčko Distrikt BiH (u daljem tekstu: Kompanija) dužno je omogućiti distribuciju električne energije, te vršiti snabdijevanje korisnika sistema i kupaca električnom energijom na svom području djelovanja.

U skladu sa članom 7. Zakona o prijenosu, regulatoru i operatoru sistema električne energije u Bosni i Hercegovini (“Službeni glasnik BiH”, br. 7/02, 13/03, 76/09 i 1/11 – u daljem tekstu: Zakon o prijenosu) i članom 107a. Zakona o električnoj energiji (“Službeni glasnik BD BiH”, br. 36/04, 28/07 i 61/10) za obavljanje ovih aktivnosti Kompanija je bila dužna pribaviti licencu Državne regulatorne komisije za električnu energiju (u daljem tekstu: DERK), a prema uvjetima, kriterijumima i procedurama koje odredi DERK.

Kompanija je od 19. januara 2011. godine vlasnik privremene licence za obavljanje djelatnosti distribucije i snabdijevanja električnom energijom na području Brčko Distrikta

BiH, registracijski broj: 05-28-12-017-2/11 izdate odlukom DERK ("Službeni glasnik BiH", broj 7/11).

Tarife za usluge proizvodnje, distribucije i snabdijevanja električnom energijom u Brčko Distriktu BiH, saglasno naprijed pomenutim zakonima regulira i odobrava DERK.

U cilju nesmetanog finansiranja Kompanije, DERK je svojom odlukom broj: 04-28-5-018-5/11 od 27. januara 2011. godine odredio privremene tarifne stavove, koji služe za obračun i naplatu električne energije od nekvalificiranih (tarifnih) kupaca električne energije u Brčko Distriktu BiH.

U nastavku aktivnosti na uspostavljanju transparentnih pravila za reguliranje elektroenergetskih djelatnosti na teritoriji Brčko Distrikta BiH, DERK je 26. oktobra 2011. godine usvojio *Metodologiju za izradu tarifa za usluge distribucije električne energije u Brčko Distriktu Bosne i Hercegovine* ("Službeni glasnik BiH", broj 89/11 – u daljem tekstu Metodologija).

U skladu sa odredbama Metodologije, Kompanija je 4. novembra 2011. godine uputila DERK-u zahtjev za određivanje tarifa za usluge distribucije električne energije broj: 02.01-16685/11 (zaprimljen u DERK-u pod brojem: 04-28-5-334/11 dana 4. novembra 2011. godine), a tarifni postupak pokrenut je zaključkom DERK-a broj 04-28-5-334-1/11 od 8. novembra 2011. godine.

DERK je uvažio okolnosti da je Kompaniji bilo samo djelimično moguće ispoštovati da zahtjev bude podnjet na tarifnim obrascima, sa svim podacima i informacijama propisanim *Odlukom o određivanju obrazaca za dostavljanje podataka u tarifnom postupku* ("Službeni glasnik BiH", broj 44/05).

U planu za 2012. godinu Kompanija planira količinu električne energije za potrebe snabdijevanja kupaca u Brčko Distriktu BiH u iznosu 280.100.000 kWh. Takođe, planirani su distributivni gubici od 13,8% tj. u apsolutnom iznosu od 38.665.115 kWh, tako da ukupna energija koja ulazi u obračun distributivne mrežarine iznosi 241.434.885 kWh.

Razmatranje zahtjeva za tarife kroz postupak odobravanja tarifa u najvećoj mogućoj mjeri mora ispoštovati osnovna načela koja propisuju da će tarife biti pravedne i razumne, ravnopravne, zasnovane na objektivnim kriterijima i opravdanim troškovima i određene na transparentan način.

Podaci Kompanije za djelatnost distribucije električne energije navode slijedeće planirane troškove i rashode za 2012. godinu, ostvarenje za 2010. godinu i procjenu ostvarenja za 2011. godinu:

Troškovi i rashodi (KM)	2010	2011 procjena	2012 zahtjev
Materijalni troškovi	1 004 748	836 730	1 137 500
Troškovi usluga	345 065	331 237	427 700
Troškovi radne snage	3.828.406	4 142 316	4 311 300
Amortizacija	421 640	474 012	518 700
Nematerijalni troškovi	243.989	262 041	277 850
Ostali rashodi	229 066	150 000	162 751
Ukupno troškovi i rashodi	6 072 914	6 196 336	6 835 801

Uz naprijed pomenuta ograničenja u pogledu potpunosti, pouzdanosti i jasnoće dostupnih informacija, Komisija je usmjerila svoja razmatranja na sve elemente u troškovnoj strukturi koje je isticala Kompanija, te na osnovu njihove vlastite opservacije izlaže slijedeća svoja stanovišta:

Iz nacrtu finansijskog plana Kompanije za 2012. godinu može se sagledati struktura troškova u kategoriji *materijalnih troškova*. Obzirom na ostvarenje ove vrste troškova u proteklom periodu, te očekivanja da će ostvarenjem planiranih investicija biti povećan obim sredstava u vlasništvu Kompanije, može se odobriti za ovu grupu troškova iznos od 1 004 748 KM koji je u visini ostvarenja u 2010. godini.

Za razliku od finansijskih izvještaja za 2010. godinu i procjene za 2011. godinu, u planu za 2012. godinu Kompanija eksplicitno ne navodi *troškove usluga*, ali se zahtijevani iznos može prepoznati pod stavkom proizvodnih troškova. Iako u komentarima na Izvještaj voditelja postupka Kompanija tvrdi da je uočeni trend troškova usluga više posljedica mogućnosti ulaganja preduzeća u ovu vrstu radova, a manje stvarnih potreba baziranih na stvarnom stanju opreme, Komisija smatra da je primjetan određeni stabilan trend kada su u pitanju ovi troškovi, pa se iz svih predočenih dokaza podnosioca zahtjeva ne može zaključiti da postoji potreba za značajnim povećanjem u odnosu na procjenu ostvarenja u 2011. godini. Iz navedenih razloga se za 2012. godinu smatra opravdanim za trošak usluga odobriti iznos od 348.329 KM.

Za *trošak radne snage* u 2012. godini Kompanija je zatražila iznos od 4.311.300 KM, što uz povećanje prosječnog broja zaposlenih na 259 čini prosječno povećanje troška po zaposlenom od oko 2%. Obzirom da nije dostavljena detaljnija sistematizacija radnih mjesta, a da se alokacija zajedničkog (administracijskog) osoblja vrši prema učešću prihoda radnih jedinica u ukupno ostvarenom prihodu preduzeća, nameće se zaključak da je velika većina troškova rada administrativnog osoblja alocirana na elektroenergetsku djelatnost u Kompaniji. Evidentno je da Kompanija, pored 13 radnika zaposlenih u 2011. godini (razlika broja prosječno zaposlenih u 2011. i 2010. godini), planira zaposliti još 8 novih radnika u 2012. godini. Opravdanost namjere zapošljavanja novih radnika nije posebno obrazložena, a i obim rada i usluga RJ Elektrodistribucija se značajno ne mijenja u odnosu na raniji period. Uzimajući u obzir sveukupnu ekonomsku situaciju i potrebu ograničavanja troškova ove vrste, nije opravdano odobriti zahtijevano povećanje troška radne snage. Ukoliko se pretpostavi da će u 2012. godini u Kompaniji biti prosječno više 8 zaposlenih, sa dostignutim prosječnim plaćama i naknadama iz 2011. godine, razumno je odobriti odgovarajuće povećanje troška radne snage za 3% u odnosu na procjenu ostvarenja u 2011. godini, što predstavlja ukupan iznos od 4.270.439 KM.

U tarifnom zahtjevu Kompanija nije posebno obrazlagala visinu *troška amortizacije*, ali je kroz javnu raspravu pojašnjen obračun troška amortizacije na sredstva koja se vode vanbilansno i stanje ostalih sredstava u bilansu stanja za 2012. godinu. Obzirom da je Kompanija obračun amortizacije vršila samo na sredstava u svom vlasništvu, može se zaključiti da je porast troška amortizacije u 2012. godini uzrokovan planiranim aktiviranjem sredstava, te se smatra opravdanim odobriti trošak amortizacije u traženom iznosu od 518.700 KM.

U grupi *nematerijalnih troškova* podrazumijevaju se nematerijalni troškovi kao što su: troškovi reprezentacije, troškovi osiguranja imovine i lica, troškovi članarina i ostali nematerijalni troškovi (stipendije, takse, registracija vozila itd.). U normalnim uvjetima, po svojoj strukturi ova kategorija troškova ne zavisi mnogo od redovnog poslovanja. Imajući u vidu da Kompanija nije detaljnije obrazložila traženo povećanje, ne može se opravdati zahtijevani iznos na ovoj troškovnoj poziciji, već je logičnije i razumno da se odobri trošak u iznosu od 243.989 KM što odgovara ostvarenju u 2010. godini.

Obzirom da Kompanija nije dostavila detaljniju analitiku pozicije *ostalih rashoda*, niti pružila obrazloženje za ovu grupu troškova, smatra se razumnim odobriti iznos na nivou ostvarenja u 2011. godini od 150.000 KM.

Imajući u vidu sve navedeno, određen je potreban prihod u 2012. godini Kompaniji za djelatnost distribucije električne energije u iznosu od 6.536.205 KM.

U cilju određivanja distributivne mrežarine tj. tarifnih stavova za usluge distribucije električne energije u Brčko Distriktu BiH, neophodno je uzeti u obzir i ostale troškove koji se odnose na distributivnu djelatnost.

Trošak distributivnih gubitaka električne energije utvrđuje se na osnovu prosječne cijene nabavke električne energije koja iznosi 6,4917 feninga/kWh i planirane količine električne energije za pokrivanje distributivnih gubitaka od 38 665 115 kWh, što u konačnom daje iznos od 2.510.023 KM.

Troškovi prijenosne mreže za korisnike distributivnog sistema određeni su na bazi jediničnih cijena od 0,566 feninga/kWh i 1,454 KM/kW za preuzetu električnu energiju iz mreže prijenosa (280 100 000 kWh planirano preuzimanje u 2012.) i u apsolutnom iznosu su 2.398.711 KM.

Troškovi rada Nezavisnog operatora sistema na bazi jedinične cijene od 0,0435 feninga/kWh i preuzete aktivne električne energije iz mreže prijenosa iznose 121.844 KM.

Troškovi pomoćnih usluga (troškovi obezbjeđenja rezerve snage za sekundarnu i tercijarnu regulaciju) u tarifi za korisnike distributivnog sistema određeni su na bazi ukupne tarife za sekundarnu i tercijarnu regulaciju i preuzete aktivne električne energije iz prijenosne mreže i iznose 596.053 KM.

Troškovi prijenosnih gubitaka u tarifi za korisnike distributivnog sistema određeni su na bazi prosječne proizvodne cijene aktivne energije na pragu proizvodnje unutar balansno odgovorne strane i preuzete aktivne električne energije iz prijenosne mreže i iznose 464.966 KM.

Ukupan potreban prihod (ukupni troškovi) za izračun tarifa za uslugu distribucije električne energije u Brčko Distriktu BiH iznosi 12.627.802 KM, pri čemu električna energija na osnovu koje se izračunava prosječna distributivna mrežarina iznosi 241 434 885 kWh.

Ukupni troškovi distributivne elektroenergetske mreže u Brčko Distriktu BiH se, prema Metodologiji, alociraju na kategorije potrošnje korisnika distributivnog sistema po tarifnim elementima i stavovima.

Prema mišljenju Komisije, predloženi tarifni stavovi pružaju realnu osnovu Kompaniji da u 2012. godini za djelatnost distribucije električne energije ostvari potreban prihod za nesmetano funkcioniranje.

Na osnovu naprijed izloženih stanovišta Komisije, u okvirima njenih diskrecijskih prava da potvrdi reprezentativnost i opravdanost svih podnijetih podataka i tvrdnji, da procjenjuje stepen vjerovatnoće ostvarenja svih prognoziranih troškova i rashoda i da odobrava tarife uvažavajući i konkretne okolnosti u periodu podnošenja zahtjeva za odobrenje tarifa sve do objektivizacije uvjeta za njihovo preciznije određivanje, te koristeći proširena ovlaštenja utvrđena Zakonom o prijenosu i Zakonom o električnoj energiji Brčko Distrikta BiH da uređuje i pitanja reguliranja distribucije električne energije kupcima na području Brčko Distrikta BiH, Komisija donosi odluku kao u dispozitivu.

DERK će kontinuirano pratiti efekte primjene usvojenih tarifa zadržavajući pravo podešavanja tarifa kada ocijeni da je to potrebno.

U skladu sa članom 9.2 *Zakona o prijenosu, regulatoru i operatoru sistema električne energije u Bosni i Hercegovini*, protiv ove odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana objave ove odluke.

Broj: 04-28-5-334-17/11
22. decembra 2011. godine
Tuzla

Predsjedavajući Komisije

Nikola Pejić